



## REPUBLIKA E KOSOVËS / REPUBLIKA KOSOVA

---

CN.nr.315/2024

GJYKATA SUPREME E KOSOVËS, kolegji i përbërë nga gjyqtarët: Rustem Thaqi, kryetar, Beshir Islami dhe Milena Gjeriq, anëtarë, në çështjen juridike përmbarimore të kreditorit: “G. V. F.” S.P.A., me seli në I., të cilin e përfaqëson Bajram Morina, avokat në Gj., sipas autorizimit, kundër debitorit: “I. F.” Sh.P.K., me numër të biznesit ... , me seli në L., S., nr. ..., objekti ..., për propozimin e kreditorit për përmbarim, përkitazi me konfliktin e kompetencës, në seancën e kolegjit të mbajtur më 23.12.2024, merr këtë:

### A K T V E N D I M

Për të gjykuar në këtë çështje juridike - përmbarimore të kreditorit: “G. V. F.” S.P.A., me seli në I., kundër debitorit: “I. F.” Sh.P.K., me numër të biznesit ..., me seli në L., S., nr. ... , objekti ... , me kompetencë lëndore është Gjykata Themelore në Prishtinë - Dega në Graçanicë, të cilës shkresat e lëndës i dërgohen në kompetencë të mëtejme.

### A r s y e t i m i

Gjykata Themelore në Prishtinë - Dega në Graçanicë, me aktvendimin Cp.nr. 03/18, të datës 20.02.2023, ka vendosur: I. Gjykata Themelore në Prishtinë - Dega në Graçanicë, shpallë veten jokompetente për të vepruar në këtë çështje juridike. II. Pas formës së prerë të këtij vendimi, lënda do të kalojë në Gjykatën Ekonomike në Prishtinë si gjykatë kompetente.

Gjykata Komerciale në Prishtinë - Dhomat e Shkallës së Parë - Departamenti për Çështje Ekonomike me aktvendimin KPPP.nr. 1346/24 të datës 21.11.2024, ka vendosur: I. Hapet konflikti i kompetencës në mes të Gjykatës Komerciale të Kosovës - Dhomat e Shkallës së Parë - Departamenti për Çështje Ekonomike dhe Gjykatës Themelore në Prishtinë - Dega në Graçanicë, për të vendosur në çështjen juridike përmbarimore në mes të kreditorit “G. V. F.” S.P.A., me seli në I. , dhe debitorit “I. F.” Sh.P.K., me seli në L. . II. Për të vendosur lidhur më konfliktin e kompetencës lënda i dërgohet Gjykatës Supreme të Kosovës.

Në bazë të nenit 25 paragrafi 2 të LPK-së, të Ligjit për Gjykatat, Ligji nr.06/L-054 i datës 23.11.2018, konfliktin lidhur me kompetencën midis gjykatave të llojit të ndryshëm e zgjidhë Gjykata Supreme e Kosovës. Në këtë rast Gjykata e Supreme e Kosovës, si gjykatë më e lartë dhe e përbashkët për gjykatat në konflikt ka kompetencë lidhur me zgjidhjen e konfliktit të kompetencës, ndërsa në bazë të nenit 15 paragrafi 3, të LPK-së, përcaktohet se: “ Zgjidhjen e konfliktit për kompetencë territoriale dhe zgjidhjen e konfliktit për kompetencë e cakton trupi gjykues prej tre gjykatësve ”.

Në këtë rast kemi të bëjmë me çështjen përbarimore midis kreditorit: “G. V. F.” S.P.A., me seli në I. , i cili ka ushtruar propozim, për caktimin e përbarimit, kundër debitorit: “I. F.” Sh.P.K., me numër të biznesit ... , me seli në L., për shkak të borxhit. Kreditori i ka propozuar gjykatës përbarimin në bazë të dokumentit të besueshëm faturave, ku parashihet se debitori i ka borxh propozuesit shumën prej 53,041.58 €.

Debitori më datë 31.05.2011, ka paraqitur kundërshtim kundër urdhrin përbarimorë E.nr. 147/2011, të datës 13.04.2011, me propozim për kthim në gjendjen e mëparshme, ndërsa me aktvendimin e Gjykatës Ekonomike të Qarkut Prishtinë, II. C.nr.148/2011 të datës 20.07.2011, është hedhur si i pasafatshëm kundërshtimi i debitorit “I. F.” Sh.P.K., nga fshati S. – L. dhe aktvendimi E.nr. 147/2011, i datës 13.04.2011, ka mbetur në fuqi.

Kundër vendimit të Gjykatës Ekonomike të Qarkut Prishtinë, II.C.nr.148/2011 të datës 20.07.2011, debitori ka ushtruar ankesë në Gjykatën Supreme, ndërsa Gjykata Supreme me aktvendimin Ae.nr.151/2011 të datës 19.11.2012, e ka refuzuar si të pabazuar ankesën e debitorit dhe e ka vërtetuar aktvendimi i Gjykatës Ekonomike të Qarkut Prishtinë, II C.nr. 148/2011 të datës 20.07.2011.

Gjykata Supreme e Kosovës, pas shqyrtimit të shkresave të lëndës lidhur me konfliktin e kompetencës në mes të Gjykatës Themelore në Prishtinë - Dega në Graçanicë dhe Gjykatës Komerciale në Prishtinë - Dhomat e Shkallës së Parë - Departamenti i për Çështje Ekonomike, gjeti se kompetente lëndore për të vendosur në këtë çështje juridike është Gjykata Themelore në Prishtinë - Dega në Graçanicë, për arsye se:

Me nenin 1 të Ligjit për Procedurën Përbarimore, përcaktohet se: “ 1. Ky ligj rregullon procedurën përmes së cilës gjykatat dhe përbaruesit privat përcaktojnë dhe zbatojnë përbarimin në bazë të dokumenteve përbarues dhe dokumenteve të besueshme, përveç nëse me ligj të veçantë parashihet ndryshe ”.

Me nenin 12 paragrafi 1 të Ligjit për Gjykatat nr.06/L-054, i shpallur në Gazetën Zyrtare nr. 22, datë 18 dhjetor 2018, përcaktohet se: “Gjykatat themelore janë kompetente për të gjykuar në shkallë të parë të gjitha çështjet, përpos nëse me ligj parashihet ndryshe ” .

Me nenin 13 paragrafi 1, nën paragrafi 1.1 dhe 1.2, të Ligjit Nr. 08/L-015, për Gjykatën Komerciale, përcaktohet se: “ Gjykata Komerciale është kompetente për të gjykuar, dhe ka juridiksion ekskluziv për të gjykuar: 1.1. kontestet ndërmjet shoqërive tregtare vendore dhe të huaja, si dhe kontestet ndërmjet personave juridikë publikë dhe privat, në lidhje me çështjet e

ndërsjella tregtare dhe çështje tjera mes tyre; 1.2. të gjitha mjetet juridike, siç përcaktohet me ligjin e aplikueshëm për procedurën përbarimore, për çështje brenda kompetencës të kësaj gjykate;...”

Gjykata Supreme e Kosovës, vlerëson se në këtë rast me kompetencë lëndore për të vendosur në këtë çështje juridike-përbarimore në këtë fazë të procedurës është Gjykata Themelore në Prishtinë - Dega në Graçanicë, për faktin se duke u bazuar në shkresat e lëndës shihet se në këtë çështje ka përfunduar e gjithë procedura përbarimore dhe e njëjta është vetëm në fazën e zbatimit të përbarimit. Në këtë rast kemi ushtrim të prapësimit nga ana e debitorit dhe lidhur me këtë ka vendosur gjykata e shkallës së parë dhe i njëjti vendim është vërtetuar edhe nga ana e Gjykatës Supreme, duke pas parasysh se janë shtjerr të gjitha mjetet juridike dhe lënda është në fazën përfundimtare, pra në fazën e zbatimit të përbarimit, Gjykata Supreme vlerëson se, Gjykata Themelore në Prishtinë - Dega në Graçanicë, mbi bazën e këtyre rrethanave nuk ka mundur të shpallet jokompetente në pikëpamje lëndore por është dashur të vazhdoj në trajtimin e rastit ashtu siç është përcaktuar me dispozitat e LPP-së. Në rastet kur kemi të bëjmë me zbatimin e përbarimit sipas propozimit të kreditorit, pasi që është zhvilluar e tërë procedura përbarimore në gjykatën e shkallës së parë, në asnjë rast nuk mund të jetë kompetente Gjykata Komerciale - Dhomat e Shkallës së parë, sepse e njëjta vendos vetëm lidhur me mjetet juridike që paraqiten ndaj lejimit të përbarimit. Ndërsa në rastin kur palët nuk kanë paraqitur mjet juridik (prapsim apo ankesë), apo në rastet kur gjykata e shkallës së parë ka vendosur edhe lidhur me prapësimin e debitorit dhe procedura lidhur me prapësimin është bërë e formës së prerë, në të gjitha këto raste kompetente për të përfunduar procedurën përbarimore janë gjykatat themelore, varësisht prej kompetencës territoriale.

Nëse ndonjëra nga palët do të paraqiste ndonjë mjet juridik në këtë çështje përbarimore, dhe lidhur me mjetin juridik rezulton se nuk është vendosur ende nga gjykata e shkallës së parë dhe vendimi lidhur me prapësimin nuk është bërë i formës së prerë, atëherë kjo çështje përbarimore do të ishte në kompetencë të Gjykatës Komerciale, nëse plotësohen kushtet e përcaktuar sipas Ligjit për Gjykatën Komerciale të cekur më lart, sepse Gjykata Komerciale ka kompetencë lëndore që të vendosë për të gjitha mjetet juridike, siç përcaktohet me ligjin e aplikueshëm për procedurën përbarimore, ashtu siç është përcaktuar me nenin 13 paragrafi 1, pika 1.2 të Ligjit për Gjykatën Komerciale.

Nga sa u tha më lart, e në kuptim të dispozitës së nenit 25.2 të LPK, u vendos si në dispozitiv të këtij aktvendimi.

**GJYKATA SUPREME E KOSOVËS - PRISHTINË**  
CN.nr.315/2024 datë 23.12.2024.

Kryetari i kolegjit  
Rrustem Thaqi